

# Vuk'uzenzele

Uyetfulelwa Lumphiko Lwetekuchumana Netekwatisa (i-GCIS)

Siswati/English

Inhlaba 2022 Lushicilelo 1

## Bahlengikati bekucala betilwane batfola ticu tabo

Allison Cooper

**K**uba ngulomunye webahlengikati bekucala betilwane kutsi batfole ticu kukuphumelela kweliphupho lesakhamuti saseRandburg Phumelela Mthimkhulu (21), lobekanelutsandvo lwetilwane kusukela ase-sengumntfwana.

Mthimkhulu usandza kutfole ticu takhe Eyunivesithi YasePretoria (i-UP), lekungiso sodvwa sikhungo sekufundzela kuhlenga tiwane eNingizimu Afrika, utfole ticu te-Bachelor of Veterinary Nursing.

“Angikhoni kukuvisisa loku lokwentekile. Kwati kutsi bengiyincenye yeliklasi lekucala lekwenza tifundvo te-degree, lokutsetse iminyaka kutsi kwenteke, kuyintfo lenhle kakhulu.

“Ngiyawabonga lama-tfuba naleminyango letasivulekela sibahlengikati ekutsi sikhone kuchubeka netifundvo tetfu bese siba bochwepheshe labakhetse-

kile kulomkhakha wetfu, lebekuyintfo lenzima kuyenta esikhatsini lesengcile,” usho njalo.

Tamarin Fisher, Longumengameli Wenhlangano Yebahlengikati Betilwane Eningizimu Afrika, utsi loku kuyincophamlandvo kulomsebenti loseneminyaka le-42.

“Ticu letinsha teminyaka lemitsatfu titawuniketa bahlengikati labaceceshiwe litfuba lekutsi babhalisele kwenta tifundvo tabo te-postgraduate, lokutawenta kutsi batfole ticu te-honours, te-masters nete-PhD.”

Bodokotela betilwane bayatilapha uma tilimele noma tigula, ngendlela lefanako neyabodokotela uma balapha bantfu. Bahlengikati betilwane bamcoka kakhulu emacenjini ebuchwephesha abodokotela betilwane, kusho Mthimkhulu.

“Lamanye emakhono lamcoka lekufuneka umhlengikati abe nawo kunakekela sigulane, kukhuluma nemaklayenti, kusita

bodokotela betilwane ngetindlela tekulapha, nanganoma ngani letawusita sibhedlela setilwane kutsi sente umsebenti waso ngemphumelelo.

“Kungulomunye wemisebenti lokhokhelako. Uma ufuna kuba ngumhlengikati wetilwane, ungavumeli kwesaba noma kuswela lwati kukuvimbele kutsi ungakulingi nekutsi ukutfole ngoba kutawugucula imphilo yakho ibe ngulencono,” kusho Mthimkhulu.

### Imifundzate letawubukana nekuswelakala kwemakhono

Ngenca yekuswelakala kakhulu kwemakhono kulomkhakha, Mthimkhulu akazange ahlupheke kutfole umsebenti.

“Ngaba nenhlanhla kutfole umsebenti e-Fourways Veterinary Hospital ngalesikhatsi ngenta umnyaka wekufundza wekugcina. Ngacala kusebenta lapho emva kwenyanga ngicedze

kubhala luhlolo lwami lwekugcina futsi ngisaloku ngisitfokotela sonkhe sikhatsi salomsebenti,” usho njalo.

Luphiko i-Health and Welfare Sector Education and Training Authority (i-HWSETA) lutibophelele kubukana nalokuswelakala kakhulu kwemakhono kulo mkhakha wete kulashwa kwetilwane nasekucinisekiseni kutsi kuba netingucuko.


Muva nje loluphiko lusandza kucala Umkhankhaso Lowatisa Ngetemisebenti Yetesayensi Kutekulashwa Kwetilwane, ngekusebentisana NeLitiko Letemfundvo Lephakeme Netekucecsha, futsi batawuvakashela tikolo tasemakhaya kute bagcugcutele ba-

fundzi kutsi bente tifundvo temisebenti yekulashwa kwe-




**Phumelela Mthimkhulu longomunye webahlengikati betilwane bekucala labaneticu kulelive.**

**Iyachubeka elikhasini lesi-2**



**Landza likhadi lakho lelayisensi yekushayela**

**Likhasi lesi-2**



**Kwakha kabusha timphilo emva kwetikhukhula**

**Likhasi lesi-3**



Kufundza i-Vuk'uzenzele faka i-GOVAPP ku:



Bheka u-SA Government ku-Google playstore nome ku-appstore

TSINTSANA NATSI

Vuk'uzenzele

@VukuzenzeleNews

Iwebhusaythi: [www.gcis.gov.za](http://www.gcis.gov.za)

I-imeyli: [vukuzenzele@gcis.gov.za](mailto:vukuzenzele@gcis.gov.za)

[www.vukuzenzele.gov.za](http://www.vukuzenzele.gov.za)

Lucingo: (+27) 12 473 0103

Tshedimosetso House:

1035 cnr Frances Baard and Festival streets, Hatfield, Pretoria, 0083

**ELEMAHHALA ALITSENGISI**



## Isuka elikhasini leku-1

tilwane kute kube yindlela yabo yemsebeni.

Luphindze futsi lwameme-tela kutsi kunemifundzate le-60 letawubukana naloku-swelakala lokubucayi kwabodokotela nekwebasebenti betekulashwa kwetilwane etindzaweni tasemakhaya eNingizimu Afrika.

“Lemifundzate icondziswe kakhulu kuphela kuba-fundzi labasetindzaweni tasemakhaya njengoba kulindlelele kutsi bahambe nalolwati babuyele nalo etindzaweni tabo lapho babuya khona,” kusho Dkt Nomfundo Mnisi, Sihlalo we-HWSETA.

Lisekela Lendvuna Yetemfundvo Lephakeme, Tesayensi Netekuticambela, Buti Manamela, wayamukela lemifundzate.

Sigaba Setemfundvo Setesayensi Kutekula-shwa Kwetilwane sase-UP sitawusita i-HWSETA nge-

## “Ngiyatfokota kakhulu ngalamatfuba nangeminyango letasivulekela sibahlengikati kute sikhone kuchubeka netifundvo tetfu tekuba bochwepheshe labakhethsekile kulomsebeni wetfu, lobekumatima kuwenta esikhatsini lesengcile.”

mikhankhaso yekwatisa, yesikhwama semifundzate neyekuheha bafundzi.

“Sitawuphindza futsi sisite i-HWSETA ekulawuleni lemifundzate, letawuniketwa bafundzi bemnyaka wekucala kutekulashwa kwetilwane labavela kulamacembu labekiwe,” kusho Chris Blerk, Inhloko Yetekuchumana Netetindzaba Kumkhakha Wetesayensi Yetekulashwa Kwetilwane e-UP.

Utsi lusha lolufuna kuhamba etinyatselweni taMthimkhulu nekubhalisela ticu tekucala e-UP kufuneka lube luphotfule Matikuletjeni (i-NSC),

noma imiphumela lelingana naloko, futsi babe bahambisana nesidzingo lesimkhawulo lomncane lobekiwe.

“Kuticu te-Bachelor of Veterinary Nursing, kudzingeka ube nemaphuzu ekwamukelwa la-28 kanye ne-NSC leneSingisi Njengelulwimi Lwasekhaya noma Sibe Lulwimi Lwekucala Lwengetiwe, tibalo, kanye ne-physical science noma ne-life sciences,” wengeta ngaloko.

Kutfole lwati lolubanti ngalomkhakha, lusha lungatsintsa bodokotela betilwane labatimele noma bakhulume nabodokotela

betilwane bemimmango (i-CCS) labayincenye yeLitiko Letekulima, Tingucuko Kutemhlaba Nekutftukiswa Kwetindzawo Tasemakhaya (i-DALRRD) labakulo lonkhe live letfu.

“Luhlelo lwe-CCS luhlose kwenta kutsi kube neku-finyelela nekutfolakala

kwetinsita tekulashwa kwetilwane letingabiti kakhulu etindzaweni letingenatinsita letanele eNingizimu Afrika. Ngaloko, bodokotela betilwane labakuloluhlelo batawuhlala basebenta njengemitfombo yelwatiso,” kusho Van Blerk. 

### Usifaka njani sicelo

Kufaka sicelo kuleminye yalemifundzate, bafundzi labafanelekile kufuneka bafake ticelo te-Bachelor of Veterinary Science nete-Bachelor of Veterinary Nursing (khetsa tifundvo totimbili) kuluhlelo lwe-ithanethi lwe-UP ku- [www.up.ac.za/online-application](http://www.up.ac.za/online-application). Labafaka ticelo bangatitfumeli ngco ticelo tabo ku-HWSETA

Lusuku lekuvala kufaka ticelo ngumhla ti-30 Inhlaba.

**Kutfole lwati lolubanti mayelana nemisebenti yetesayensi yekulashwa kwetilwane lefu-ndzelwako e-UP**, vakashela ku-[www.up.ac.za/faculty-of-veterinary-science](http://www.up.ac.za/faculty-of-veterinary-science).

**Kutfole lwati lolubanti mayelana naleminye mifundzate lekhona kulomkhakha**, vakashela ku-[www.up.ac.za/faculty-of-veterinary-science/article/33926/bursaries-for-veterinary-science-studies](http://www.up.ac.za/faculty-of-veterinary-science/article/33926/bursaries-for-veterinary-science-studies).

# Landza Likhadi lakho lelayisensi yekushayela

**B**ashayeli betimoto labafake ticelo telikhadi lelisha noma lekuvuselela ilayisensi yekushayela noma imvume yekushayela ngekwemsebeni i-professional driving permit (i-PrDP) emkhatsini kweMphala neNgongoni lomnyaka lowengcile bayacelwa kutsi balandze emakhadi abo.

Ngekusho kweNhlangano Lelawula Titfutisi Emgwaceni (i-RTMC), kulandvwe kuphela emakhadi ekushayela la-42% kulalangu-32 748 lakhicitiwe ngalesikhatsi.

Indvuna Yetekutfutsa Fikile Mbalula uvule tikhungo temalayisensi te-RTMC eMidrand nase-Eco Park lomnyaka lophelile, kute alwe kucedza lokusalela emuva kwemalayisensi



lasaphelelwe sikhatsi ngenca ye-COVID-19.

I-Akhawunti Yelikhadi Lelayisensi Yekushayela, lephrinta lamalayisensi, isebenta busuku nemini kukhulisa kukhici futsi itibophelele kucedza lokusalela emuva ngasekupheleni kweNhlab.

I-RTMC itsi bantfu

bangahlola simo seticelo tabo ngembi kwekuya kutikhungo tekuhlolwa bayolandza emalayisensi abo.

Loku kungentiwa ye-SMS noma nge-inthanethi.

### Imibuto ye-SMS lemayelana nemalayisensi ekushayela

Uma unembuto ngelayisensi yekushayela, labafake ticelo bangatfumela i-SMS kanye nenombolo yabo yamatisi ku-33214. Batawubese batfole yinye yalama-SMS lalandzelako:

- *Application received: The application was received, but has not yet been processed.*
- *Production queue: The card is still being processed and manufactured.*
- *Produced and ready for collection: The card will be ready*

for collection in 21 days. However, due to the high number of cards being processed, the RTMC advises you to wait 35 days before going to collect.

- *Problem card: There is a problem with the production of your card. Please return to the testing centre.*

Uma unembuto nge-PrDP, tfumela inombolo yakho yamatisi nge-SMS ku-44220.


### Imibuto ye-inthanethi lemayelana nemalayisensi ekushayela

Ungakhona futsi kutfole simo sesicelo sakho mahala ku-inthanethi.

- Vakashela ku-[online.natis.gov.za](http://online.natis.gov.za).
- Takhele iphrofayili bese uyangena.
- Cafata simo sesicelo sakho kudeshibhodi.

Labo emalayisensi abo

aphelelwe sikhatsi emkhatsini kweNdlovulenkulu 2020 nangemhla we-31 iNgci 2021, labangatange basibambe sikhatsi lesibekiwe lesimncamula jucu samhla ti-5 Inkhwekhweti, bayacelwa kutsi batfole ilayisensi yekushayela yesikhashana uma bafaka ticelo tekuvuselela kute bahlale bahambisana nemtsetfo.

Nanoma tikhungo te-RTMC tivulwa kusuka ngeMsombuluko kute kube Lisontfo kusuka ngensimbi ye-7 ekuseni kuya kuye-9 entsambama, emalunga emmango ayagcugcutelwa kutsi atsetse lelitfuba lelinemalayini lamancane langaLesihlanu nangeMphelasontfo. 

Lwatiso luniketwe i-RTMC



government communications

Department: Government Communication and Information System  
REPUBLIC OF SOUTH AFRICA

Tel: 012 473 0353

Email: [vukuzenzele@gcis.gov.za](mailto:vukuzenzele@gcis.gov.za)

Address: Private Bag X745, Pretoria, 0001

Head of Editorial and Production  
Regomoditswe Mavimbela  
[Regomoditswe@gcis.gov.za](mailto:Regomoditswe@gcis.gov.za)

Acting Editor-in-Chief  
Zanele Mngadi | [Zanelemngadi@gcis.gov.za](mailto:Zanelemngadi@gcis.gov.za)

Acting Managing Editor  
Tendai Gonese | [tendai@gcis.gov.za](mailto:tendai@gcis.gov.za)

News Editor  
Noluthando Motswai

Writer: More Matshediso

Graphic Designers  
Tendai Gonese | Benny Kubjana

Production Assistants  
Jauhara Khan | Sebastian Palmer

Language Practitioners  
Nomgcibelo Motha | Boitumelo Phalatshe  
Thandolunye Magudulela | Sizwe Ziqubu

All rights reserved. Reproduction of the newspaper in whole or in part without written permission is strictly prohibited.

**Vuk'uzenzele**  
is published by Government Communications (GCIS)



Printed by:



Distributed by:







# Kwakha kabusha timphilo netindlela tekutiphilisa emva kwetikhukhula

**S**ekusikhatsi leci-she sibe tinyanga letimbili kusukela kwabanetikhukhula letine-mandla letabanga tinkinga kuyo yonkhe iKwaZulu-Natali, iMphumalanga Kapa kanye neNyakatfo Nshonalanga, letibange kutsi kube nekulahleka lokukhulu kwemphilo kanye nekulimala kwemphahla nesakhiwonchanti.

Ngisandza kuvakashela eThekwini KwaZulu-Natali kuyohlangana nabosomabhizinisi balelidolobhakati kute sendlulise kubasekela kumitamo yabo yekuphindza babuyisela kusebenta kwetintfo.

Ngesikhatsi kwenteka lenhlekelele yemvelo, kube nekukhatsateka kutsi baphatsi abanawo emandla noma sifiso sekuphendvula ngendlela lefanele nalesebentako kulesimo salabo labalahlekelwe ngiko konkhe bebanako.

Uma sengiya kwesibili kulelidolobhakati kusukela kwaba naletikhukhula, kwangicacela kutsi lokukhatsateka bekungakafaneli. IKwaZulu-Natali, njengoba kunjalo naseMphumalanga Kapa naseNyakatfo Nshonalanga, bonkhe labadlala indzima bebasebenta nge-  
kutikhandla kute balulame kulesehlakalo lesibuhlungu.

Sikhungo Savelonkhe Sekulawula Inhlekelele besichumanisa yonkhe imikhakha yahlumende kumitamo yaso yekuletsa lusito lwetebuntfu emindenini leminengi letsintsekile.



Kube yintfo lejabulisako kubona tinhlango letitimele tingenelela tisebentisana nahulumende kute tinikete lusito loludzingeka kakhulu.

Bonkhe laba labadlala indzima bebanika bantfu kudla, timphahla tekugcoka, tingubo tekulala, tekunakekela mtimba kanye netimphahla tesikolo emindenini lebutsakatsaka kute ikhone kumelana netidzingo letisisekelo. Tinsita tekuhlala kungunyalo tisaniketwa ebantfwini labangetulu kwe-7 000 kuletigodzi letine letishayeke kakhulu KwaZulu-Natali. Umsebenti wekwakha tindlu tesikhasana sewucalile kumindenini letsintsekile nemhlaba wahulumende sewukho-njiwe KwaZulu-Natali kute bahlaliswe kabusha kuwo.

Litiko Letasekhaya,

Letemphilo neLekutfutfu-kiswa Kwetenhlo nawo bewancedza imindenini letsintsekile kute ikhone kufinyelela kutinsita letimcoka. Sibonelo, emahhovi labomahamba nendlwane ancedza labo labalahlekelwa mado-khumentu abo labucayi ngaletikhukhula kute bakhone kutfola emakhadi lamasha ema-ID nangekuphindza kukhishwe letinye titifiketi tekutalwa. Tinsita letingumahamba nendlwane tetemphilo, letifaka kugomela i-COVID-19, nato tiyabonelelwa ebantfwini etindzaweni lapho khona takhiwo tingasebenti ngalokuphelele. Tindlela tekukhokhela tibonelelo tahulumende tilungisiwe kulabo labatsintsekile.

Tindlu tekufundzela letingumahamba nendlwane titsengiwe kute kufundza

nekufundzisa kungapha-tamiseki sikhatsi lesidze etikolweni letitsintsekile ngaletikhukhula.

Umsebenti wekulungisa tindzawo tekuhlanta emanti, titeshi temaphayiphi netekuhanjiswa kwemanti utawentiwa. Imigwaco leyalimala iyalungiswa. Kuhlelwe kutsi kwakhiwe emabhuloho lamasha lalishumi nesi-phohlango njengencenye yeluhlelo i-Welisizwe Rural Bridges.

Kube khona futsi inchubekela embili lenkhulu ekulungiseni sakhiwonchanti lesimcoka lesisekela Lichweba laseThekwini. Ngenca yekubaluleka kwalelichweba kumnotfo wavelonkhe nowevekati, kuhamba kwemikhumbi sekubuyele esimeni, kusebenta kwetikhumulo nako kubuyela kusebenta ngalokuphelele futsi umsebenti wekulungisa imizila yetitimela leyalimala nawo uyachubeka.

Kunetindlela letengetiwe letibekiwe tekunika kusekelangetimali kuwo omabili emabhizinisi lamancane nalamakhulu latsintsekile. Loku kufuneka kwenteke masinyane kute kucinisekiswe kutsi emabhizinisi ahlala asebenta nekutsi ematfuba emisebenti ahlala asimeme.

Etikhatsini letehlukene temlandvo wentsandvo-yelinyenti, sihlangabetane netigameko netimo letinkhulu letilinga kutibophelela kwebantfu bakitsi

kanye nekusebenta ngalokufanele kwetikhungo tetfu.

Sibone kubambisana lokungakajwayeleki nekusekelwa kwemindenini kwemimmango ya KwaZulu-Natali, yaseMphumalanga Kapa neyaseNyakatfo Nshonalanga. Bomasipala bendzawo nabohulumende betifundza bebasebentisana nematiko avelonkhe kanye nema-ejensi awo kute asite bantfu bakhe kabusha timphilo tabo nekwenza kutsi umnotfo wendzawo uphindze ubuyele usebente futsi.

Bebaloku basebentisana nabo bonkhe labadlala indzima kuto tonkhe tindzawo kucinisekisa kutsi sihlanganisa ngemphumelelo imitamo yekuvuselela neyekutsi sihlele futsi sakhe kabusha ngendlela lecinile kakhulu kutigameko letinjengaleti esikhatsini lesitako.

Kubeketela kwemimango letsintsekile, kutibophelela kwabo ekuphemeleleni kanye nelikhono lekusebentisana etikhatsini tenhlekelele kube yintfo legcugcutelanako. Sibatfulela sigcoko bonkhe labo bebayincenye yalomtamo wekusita bantfu baletifundza letitsintsekako.

Njengahlumende, sihlanganisa tonkhe tinsita futsi senta yonkhe imitamo yekucinisekisa kutsi, njengoba sakha kabusha, akekho lesimshiyako. 